

四庫全書

子部

欽定四庫全書

子部

本草乘雅半偈卷四

詳校官太醫院吏目臣吳尊夔

編修臣倉聖脈覆勘

總校官進士臣朱鈴

校對官中書臣吳甸華

謄錄監生臣黃佑

欽定四庫全書

本草乘雅半偈卷四

明 盧之頤 撰

本經中品一

玄參

水蘇

荏子 薺寧附

假蘇

麻黃

葛根

竹葉

桃核仁

杏核仁

髮髮

犀角

羚羊角

蚱蟬

本經中品二

水萍

牡丹

泉耳

即蒼耳

當歸

白芍藥

欵冬花

芎藭

陽起石

雄黃

雌黃

牛角腮

鰲甲

白殭蠶

本經中品

玄參氣味苦微寒無毒主腹中寒熱積聚女子產乳餘疾補腎氣令人明目

覈曰生河間川谷及冤句山陽近道亦有之二月生苗高四五尺莖方而大作節若竹色紫赤有細毛葉生枝間四四相值形似芍藥七月開花白色或茄花

色形似大薊花端叢刺刺端有鈎最堅且利八月結
子黑色一種莖方而細色青紫葉似脂麻對生又似
槐柳尖長邊有鋸齒七月開花青碧八月結子黑褐
根都科生一根五七枚生時青白乾即紫黑宜三八
月采修治用蒲草重重相隔入柳木甑蒸兩伏時勿
犯銅鐵器餌之噎人喉喪人目惡黃耆乾薑山茱萸
反藜蘆

叅曰玄正子半一陽將復之時也非動非靜若顯若

匿一點微芒萬鈞之力其味苦已向乎陽其氣寒未
離乎陰儼似少陰之樞象參贊化育之元始具備少
陰之體用者也主治功力與芍藥相似芍則端倪已
破玄則醞藉幽微故主寒熱積聚之欲成堅凝閉密
與產乳餘疾之已出未淨補腎氣者補腎氣方萌之
機兆非補腎藏欲藏之形質體用周備則精華上注
故令目明

冬三月此謂閉藏使志若伏若匿若有私意若已
有得非水凝如石之腎氣獨沉矣又經云冬三月

欲如運樞又云陰
者藏精而起亟也

本經中品

水蘇氣味辛微溫無毒主下氣殺穀除飲食辟口臭去
邪毒辟惡氣久服通神明輕身耐老

茺子氣味辛溫無毒主欬逆下氣溫中補體葉主調中
去臭氣

別錄

薺寧氣味辛溫無毒主冷氣洩痢生食除胸中酸水掇

碎傳蟻瘻

藏器

覈曰水蘇即紫蘇一名盧蘇處處有之喜生水旁春
二月皆以子種或子着地間次年自發莖方葉圓葉
端有尖邊作鋸齒肥地者葉面背俱色紫瘠地者僅
背紫面青七八月開花紅紫色成穗作房結實如芥
子臭香色褐碎之絞液作油甚甘美也若葉面背色
白者即在子子不甚香而葉轉辛若葉面背青白者
即薺寧葉上有毛而氣臭五月采葉七月采莖九月
采實各取得氣之全今市肆莖葉多霜後采取此已

藁之本氣味俱失不宜用也別錄另立蘇及白蘇兩條蘇即水蘇白蘇即荏子又有魚蘇雞蘇二種魚蘇即荏子同類一名葍蘇狀似茵陳葉大而香吳人用煮魚食因名魚蘇雞蘇一名回回蘇莖葉俱紫葉邊鋸齒極細密葉面交紐若剪絨狀宛似雞冠因名雞蘇王禎云即水蘇之異形故主療諸疾亦相同也

先人云諸蘇同一種類但有家蒔野生及色香氣味之殊故主治功力似異而同也皆宜于水質都柔潤

雖色香氣味稍分厚薄而辛溫芳烈則一當以本經
水蘇為正顧蘇之有荏有薺若朮之有蒼有白何須
另立門戶

叅曰此以功用詮名水取坎剛以盪活潑之體蘇則
震虢以舒陽和之用更詳色香氣味體性生成致新
推陳之宣劑輕劑也故主氣下者可使之宣發氣上
者可使之宣攝并可開發上焦宣五穀味熏膚充身
澤毛若霧露之溉故穀亦殺毒亦去臭惡亦辟神明

可通輕身耐老矣別錄用治吐血衄血及血崩此氣
不宜發宣攝以氣如橐籥血如波瀾所謂欲治其血
先調其氣若胃絡脉絕致血衄崩潰者更相宜也葉
則偏于宣散莖則偏于宣通子則兼而有之而性稍
緩別錄又出荏子藏器又出薺寧荏即水蘇之色白
者易于入肺以肺之經氣起于中焦上膈屬肺乃能
布氣四達故也薺即水蘇之色青者易于入肝以肝
之經氣終于中焦中焦食氣乃能散精于肝故也如

洩痢酸水正食氣不得散精于肝致氣冷痿厥遂成
五飲變生種種形證耳

水蘇獨為中焦主故可宣揚復可宣攝在子獨為
上焦主為經氣之始薺萇獨為下焦主為經氣之
終而三蘇之揚攝又莫不歸中焦次第以為分屬
者然水蘇樞之屬在子開之屬薺萇闔之屬矣

本經中品

假蘇氣味辛溫無毒主寒熱鼠瘻瘰癧生瘡破結聚氣
下瘀血除濕疸

葭曰假蘇即荊芥竊似盧蘇原屬野生今為俗用遂

多種蒔二月布子生苗方莖細葉似落離而細八月
開小花作穗成房房如水蘇內有細子似葶藶色黃
赤連穗收用

叅曰假者蘇之故名假蘇如假寒熱為鼠瘻為瘰癧
假氣為結為聚假血為瘀假濕為疸假偽非真者蘇
蘇震行緩散自釋矣別名疆界荊芥疆畫界分荊方
芥辛也言能畫疆界殊方域悉新以辛也

本經中品

麻黃氣味苦溫無毒主中風傷寒頭痛溫瘧發表汗出去邪熱氣止欬逆上氣除寒熱破癥堅積聚

覈曰出滎陽中牟汴京者為勝所在之處冬不積雪
二月生苗纖細勁直外黃內赤中虛作節如竹四月
梢頭開黃色花結實如百合瓣而緊小又似皂莢子
而味甜根色紫赤有雌雄兩種雌者開花結實修治
去根及節煮十多沸掠去白沫恐令人煩厚朴白薇
為之使惡辛夷石葦

叅曰表黃裏赤中虛象離生不受雪合輔心王宣揚
火令者也主治寒風溫瘧標見頭痛之標經侵淫部
署之首形層之皮致毛孔滿實逆開反闔者宣火政
令揚液為汗而張大之八萬四千毛孔莫不從令而
去邪熱氣矣但熱非病反其本得標之病即寒風暴
虐之氣使人毛孔畢直皮膚閉而為熱勁切之性仍
未反乎本氣之寒也欬逆上氣者毛孔滿閉則不能
布氣從開故上逆而欬癥堅積聚者假氣成形則不

能轉闔從開故積堅而癥蓋不獨本性不遷即本氣
猶未變易故仍可轉入為出易冬為春否則妄汗亡
液敗亂心王矣

本經中品

葛根氣味甘辛平無毒主消渴身大熱嘔吐諸痺起陰
氣解諸毒

覈曰鹿食九草此其一也出閩廣江浙所在有之有
野生有家種春生苗引藤延蔓長二三丈取治締絡

各以地土之宜以別精粗美惡耳葉有三尖似楓葉而長色青翠七月開花成穗纍纍相綴紫粉色似豌豆花結實似小黃豆莢上有毛莢中之子綠色而扁似鹽梅核生嚼腥氣即本經所謂葛穀也根大如臂外紫內白長八九尺以入土最深者良五月五日采根曝乾殺野葛巴豆百藥毒

先人云外陽內陰有三陰漸長化炎熱為清涼之象叅曰讀本經主治合仲景葛根湯法此從陽明中治

之氣化藥也謂陽明之上燥化主之不從本氣之四
氣標陽之二陽從乎中見太陰之濕化者如消渴身
大熱及闔逆或熱逆之嘔吐與邪鬱或熱鬱之諸毒
此正中見之陰氣勿起致令陽明之上燥涸殆甚葛
藤延蔓顯明葛根陰潤在中具備陽明上中下之全
體者無出其右故能從乎中治以撤諸痺痺撤則中
見上下各各從令此以化合化亦以化逆化也假以
治本偏于風盛以風木必動脾土之濕化使脾土運

行風斯息矣亦不必另配甲巳方始化合亦不必轉
生子金以復母仇即本有辛味可作甲兼甘可作巳
濕化亦巳形似肌腠亦巳也白色可作金味辛亦金
腥臭亦金藤絡堅勁亦金也假以治標偏于二陽二
陽即陽明也論部署巳深入首太陽之次陽明論形
層巳深入一皮二膚之肌分若邪停太陽之部署亦
必太陽之陽明若邪停太陽之形層亦必太陽之肌
分即正陽陽明亦屬外證延蔓之邪非內證堅凝之

實但體性陰潤或寒本濕本主氣及寒化標陰專令者所當避忌或邪在部署之首而非風木本盛或邪在形層之膚未成轉熱之勢未有不致寇至者世人不但目為輕淺且以之從治嚴寒恐非所宜也

本經痺字與風寒濕相合之痺不同如消渴身熱嘔吐及陰氣不起與諸毒皆痺也故云諸痺

顯明即陽明在中即中見

化合化者中見之濕化在上之燥化也

本經中品

竹葉氣味苦平無毒主欬逆上氣血溢筋急惡瘍殺小蟲根作湯益氣止渴補虛下氣實通神明輕身益氣

穀曰土中苞笋各以時出旬日落籜成竹也莖有節節有枝枝有節節有葉葉必三之枝必兩之枝下之枝一為雄二為雌雌者孕笋成竹根鞭喜行東南六十年一花實則枯枯曰紆實曰復小曰篠大曰蕩按戴凱之竹譜云植物之中有名曰竹不剛不柔非草非木小異實虛大同節目蓋種類六十有一焉今

略考之亦不止此曰鐘龍竹黃帝使伶倫伐之于崑崙之墟吹以應律者曰員丘帝俊竹節可為船曰衛竹薄肌而勁曰篁竹堅而促節曰棘竹生交州諸郡叢生有十數莖大者二尺圍肉至厚實中夷人破以為弓其笋食之落人鬚髮一名芭竹曰簞竹大者如腓虛細長爽南人取其笋未及竹者灰煮續以為布曰弓竹出東垂諸山中長數十丈既長且軟不能自立薛翊異物志云斑駁如玳瑁曰蘇麻竹一名沙麻

竹長數丈葉大如履竹中可愛者可以為弓五嶺左
右徧有之曰箨筴竹葉薄而廣吳都賦所謂竹則簣
簣箨筴即越女試劒竹是也桃枝是其中最細者曰
箨竹生崑崙之北南嶽之山長千丈斷節為大船曰
般腸竹生東郡緣海諸山中其形未詳曰服傷竹大
者五六寸其中實滿曰擘摩竹桂廣皆植大若茶盃
竹厚而空小一人正擎一竿見嶺表錄曰筴竹長三
丈許圍數寸至堅利土人以為矛可作彈弓弦其筴

未成竹時堪為糾又名史葉竹又名纂竹曰百葉竹
生南垂界甚有毒傷人必死一枝百葉因為名一名
箐竹曰繇箐竹為物叢生見吳都賦曰箐竹一豐二
種至似苦竹而細軟肌薄曰蓋竹亦大肌薄色白生
江南深谷山曰簡箐竹竹節疎而笋可食曰箐筒竹
見吳都賦笋可食曰雞脰竹似脰大者不過如指疎
葉黃皮曰蘆竹似蘆出揚州東垂肌理勻淨可以為
簾曰箭竹高者不過一丈節間三尺堅勁中矢筥簾

二竹亦皆中矢箬竹一尺數節葉大如扇俗謂之般
筍可以作篷亦可作矢箬篠竹中掃細竹若箭竹可
作箭莽竹疎節鄰竹堅中簡竹中空仲竹無筍俱見
爾雅種龍竹櫛竹見廣志桃枝竹皮滑而黃可以為
席簞竹實厚脆孔小幾于實中安成以南有之又桃
竹江心礪石上出可為杖竹譜云竹皆中空此竹獨
實如木利竹蔓生若藤實中而堅韌漢竹大者一節
受一斛小者受數斗菡蓿竹大如脚指筍皮未落往

往有細蟲齧之籜墮成赤文似綉畫可愛木竹出靈
隱山中堅亦通節脉菰菜竹生于海南內實外澤晉
竹吳王賜越見吳越春秋永嘉大羅山有龍牙竹其
竹長四五尺稀節人取必有大風雨雷電人下山則
止齊民要術籜竹笋無味杜臺卿淮賦有檳榔竹身
毒國出筇竹可為杖一名狹竹張騫西至大宛所得
見漢書一名芳竹廣志新州石城陝隘宋紹興中州
守黃濟植芳竹圍繞之竹有刺芒棘華然一脉不能

入澁勒竹有芒可以剉爪見老學菴筆記繇梧竹長
三四丈圍一尺八九寸可作屋柱出交趾見南方草
木狀葦竹頭有文文見字林狗竹毛在竹間見臨海
異物志無筋竹色如黃金堅貞疎節出嶺南見竺法
真羅山疏石麻竹勁利可為刀見裴淵廣州記苞竹
堪作布見顧微廣州記實心竹文彩斑駁可為器物
又垂絲竹枝弱下垂見雲南記咸都有對青竹黃而
溝青浙亦有之惟會稽頗多呼為黃金間碧玉竹見

養疴漫志護居竹見無錫縣志籊竹如苦竹長節而薄可作屋椽篴竹青皮內白如雪軟韌可為索三稜竹狀若椶櫚葉莖柄三脊射竹可為箭峽州玉泉鬼谷子洞前竹竹葉有文成符葉葉不同佩之可以避患見宋陳日華瑣碎錄有匾竹出廬山釋惠遠能役使鬼神善辟蛇行者嘗持此竹笋出亦匾建安篴簞竹一名簞竹節中有人長尺許頭足皆具大者中甑笋亦中射見異苑雷州有電斑竹見地理志相迷竹

內空生黃堪作九鏞竹內空容三升米亦生黃俱出
廣州新婦竹出武林竹圓直可作篋高潘州有疎節
竹五六尺一節通志竹之良者有篋竹又漆州通竹
直上無節空心見北戶錄桂陽縣出筌竹大者圍二
尺又交趾有篋竹實中有毒以刺虎中之則死見山
海經注辰州有龍絲竹高盈尺細如針江湖中一種
野竹其葉糾結如蟲狀名蛭蛭竹見語異錄當塗縣
慈姥山有簫管竹圓緻異于他處篋堅而促節皮白

如霜粉蜀嘉定產月竹每月生笋漢陽出籊筴竹南方草木狀扶南有雲母竹一節為船山海經舜林竹一節可為船羅陽竹若芭蕉黎母竹每丈一節臨賀竹其大十抱人面竹有節一覆一仰如畫人面廣西出雪竹斑極大紅而有暈蜀涪州有相思竹對抽並肩篋篋竹異物志南方思勞國所產可礪指甲李商隱射魚曲篋篋弩箭磨青石綉額蠻渠三虎力字又作澁勒東坡詩倦看澁勒暗蠻村合歡竹出南嶽下

渚州安思縣多苦竹有青白紫黃四色浙中有天親
竹末皆兩岐成都府彭縣大隋山生竹若龍頭俗呼
龍頭竹九嶷山有雙梢竹初生枝葉即分兩梢亦名
合歡竹荻蘆竹冬天不凋其竹似蘆荻鶴膝竹節下
大小似苦竹閩中人呼為槌竹石籊竹生閩中竹似
石竹而小古散竹節似馬鞭葉似桐樹而小皮似櫟
櫟筴竹出襄州卧龍山諸葛亮祠中長百尺只梢上
有葉雪峰語錄雪峰為刹與經蔣諸山相甲乙岡巒

百里間有簕竹玄倭國有篠幹竹少室山有麋器竹
又繇廣志永昌有漢竹圍三尺餘大者一節受一斛
神異經南方荒中有箒竹長百丈圍二丈五六尺厚
八九寸可以為船有篩竹一名太極竹可以為船占
城國出觀音竹如藤長丈八尺許色黑如鐵會稽縣
有公孫竹高不盈尺越州產越王竹狀若荻枝可代
酒籌次有沙筍竹欲採者輕步從之聞人聲則縮入
沙中羅浮山有龍公竹大徑七尺常有鳳凰栖宿增

城縣倪山產娑羅竹圍三四尺性堅可為弓篷山有
浮筠竹葉青梧竹可作屋柱奉化新嶺山生竹高僅
五寸葉皆白色清江縣瑞筠山有竹色如爛銀齊民
要術蕪竹黑皮竹汗有文莖紫子如大珠郭璞云桂
竹出始興小桂縣上合防露下疎來風每日出羅紈
金翠望若花開山經雲山有桂竹甚毒傷人必死一
曰狀如甘竹而皮赤方竹見寧波志葛仙植于定海
靈峰者益部方物志有方竹贊笋譜方竹出澧州西

游川鐵冶辰山之陽北戶錄澄州產方竹體如削成
勁挺堪為杖隔州亦出大者數丈又黑竹出西山長
二尺許如指大純墨色葉玄碧見文太史墨竹銘蘄
水縣鳳棲山下有王羲之洗筆池崖邊小竹俱成墨
色筍譜道州瀧中多丹竹每節一丈或八尺莖不大
裊裊搖空粉節上似有丹色竹譜宜都縣飛魚口有
紅竹大者不過寸許鮮明可愛黔陽縣赤竹岡岡龍
糾盤叢生赤竹雲窗雜志凝波竹出區吳山紫枝綠

葉花如石榴實如蓮子服之體輕趙飛燕舞于掌上服此實也暘谷漫錄張堂云同邑安福西鄉周俊叔家有十二時竹統節凸生子丑寅卯十二辰字點畫可數清異錄荆南判官劉或棄官秦隴篋中收大竹十餘顆每有客則斫取少許煎飲其辛香如雞舌人堅叩其名謂之丁香竹非中國所產也睽車志紹興中四明有巨商泛海阻風抵一山下因攀躡而登絕頂有梵宮焉窗外竹數个枝葉如丹商堅求一二竿

截之為杖每以刀鏤削輒隨刃有光心異之至一國
有老叟曰君親至溥陀落伽山此觀音坐後旃檀林
紫竹也商驚悔取削棄餘札寶藏之有久病無藥可
愈者煎湯飲之即愈又有似竹而異名者曰棟曰櫟
蓋別類也品類雖繁入藥宜用篁竹次用淡苦二種
又有一種薄殼者曰甘竹其葉最良

先人博議云易生易長虛中有節性質疎暢映芘幽
獨歲寒不凋春榮自若真隱君子真林下友

又云秋深引根冬半孕筍然以偶生略分先後發也
春分出土成竹枝必偶葉必三空中直上具木中有
火之象故筍可發瘡瀝通經脉茹主嘔噦葉清煩熱
皆透達木火之所不及者也

又云去外皮一重取青白之交曰茹此竹氣通上徹
下透表及裏之所用之可通上下而使氣清達表裏
而不致驟急者也

又云直達中空抽水土之力迅捷瀝即竹中之水顧

理文如腠而界節似經則通中之節固非往而不返者矣如病久渴即節而不通心煩為通而不節竹瀝之力通節交互故渴可解而煩可息但竹瀝行中有節直達之力居多須佐以薑汁便可橫徧且得盡木火之體用也

叅曰竹者物之有筋節者也故筋節字皆從竹又竹從兩個枝必二葉必三即火二木三之象也性喜東南故九河鮮有以卦推之爾雅翼云巽為竹易繫云

震為蒼筤竹蒼筤幼竹也可見方以類聚矣莖有節
節有枝枝必三枝復有節若三候成節也故主候失
符節致令氣逆氣溢或若霜露不下則菀蘖不榮致
令筋急焦渴也實通神明輕身益氣者竹六十歲始
華窮歷支干變化故也客曰吾見竹葉一歲成二歲
茂三歲密至四歲則細五歲疎六歲瘁矣未見有至
六十歲而華者頤曰古人蓋指疎理得宜根歷一元
而言不但舉一莖之榮枯已也客曰竹節生時已具

安見其與四時合耶頤曰冬半而孕春半而生夏半而代葉秋半而引根四氣歷然非獨以出土之時為生也

述異記云衛有淇園出竹在淇水之上埤雅傳云淇園箛簞下淇園之竹以為棖伐淇園之竹以為矢淇園殷紂竹箭園也蓋淇之產竹土地所宜故風人以此美衛武之德也

謝莊云直而不介弱而不虧香裊人圃簫瑟雲岩推名楚潭美質良池

江迢云有嘉生之美竹挺純姿于自然含虛中而象道體圓質而儀天托宗爽塏列族圃田

劉寬夫云堅可以配松栢勁可以凌霜雪密可以泊晴烟疎可以漏梢月嬋娟可玩勁拔不回擅變

風生韻
合宮徵

白居易云竹似賢何哉竹本固固以樹德君子見其本則思善建不拔者竹性直直以立身君子見其性則思中立不倚者竹性空空以體道君子見其思則思應用虛受者竹節貞貞以立志君子見其節則思砥礪名行夷險一致者夫如是故君子多樹之為庭實焉竹植物也于人何有哉以其有似于賢而人猶愛惜之封植之竹其真賢者乎然則竹之于草木猶賢之于衆庶竹不能自異惟人異之賢不能自異惟用賢者異之
故作記以聞于今日用賢者云

陽明子云竹有君子之道四焉中虛而靜通而有間有君子之德外節而直貫四時而柯葉無所改有君子之操應蟄而出遇伏而隱雨雪晦明無所不宜有君子之時清風時至玉磬珊珊中采齊而

協肆夏揖遜俯仰若洙泗羣賢之交集風止籟靜
挺然獨立不撓不屈恍虞廷羣后端冕正笏而列
于堂陛之側有君子之容竹有是
四者而以君子名不愧于其名

本經中品

桃核仁氣味苦平無毒主瘀血血閉癥瘕邪氣殺小蟲
花殺瘧惡鬼令人好顏色桃棗氣微溫主殺百鬼精物
桃毛主下血瘕寒熱積聚無子蠹辟邪惡不祥

覈曰桃品甚多華豔稱最不培而蕃且早結實世遂
以凡品目之然有黃者絳色垂絲者龍鱗者餅子者

牡丹者亦凡中之異矣若漢上林苑之緗桃紫紋桃
金城桃霜桃常山所獻巨核桃凌霜花灼後暑實黃
是又仙凡迥別不可得也惟山中毛桃即爾雅所謂
褫桃者小而多毛其仁充滿多脂可入藥用修治去
皮用白朮烏豆于坩鍋中煮二伏時漉出劈開中心
黃如金色乃用

埤雅云桃有花之盛者其性早花又花于仲春故
周南以興女之年時恰當桃生三歲即花果故首
雖已白其花子之利可待也周南取少桃以興所
謂桃之天天是也首章曰灼灼其華者言其花之

紅而麗也言女以盛時而嫁也二章曰有蕢其實
蕢大貌蓋桃性更七八年便老老則子細此言少
桃也言非但華色又嫁而有子夫婦之道成焉三
章曰其葉蓁蓁蓁蓁盛也言能成其家又以託其
所類也且桃性華葉齊生至于有蕢
其實然後其葉蓁蓁蓋其序如此

張正見賦曰萬株成錦千林如翼苔畫波文花然
樹色發秦源而逸氣飄漢綬而芳流譬蘭缸之夜
炷似明鏡
之朝粧

皮曰休賦曰厥花伊何其美實多臺隸衆芳緣飾
陽和開破嫩萼壓低柔柯其色則不淡不深若素
練輕茜玉顏半配若夫美景妍時春含曉滋密如
不幹繁若無枝姘姘婉婉天天怡怡或俛者若想
或間者如痴或向者若步或倚者如疲或溫香而
可薰或矮嬌而莫持或幽柔而傍午或擔冶而倒

披或翹矣如望或疑然若思或奕僎以作態或窈
窕而騁姿日將明兮似喜天將慘兮若悲近榆錢
兮粧翠靨映楊柳兮顰翠眉輕紅拖裳動則裏香
宛若鄭袖初見吳王夜凉皎潔閑然秀發又若嫦
娥欲奔明月蝶散蜂寂當閨脉脉又若姐已未聞
裂帛或開故楚豔豔春曙又若息媯含情不語或
臨金塘或交綺井又若西子浣紗見影玉露厭浥
妖紅墜濕又若驪姬將譖而泣或在水濱或臨江
浦又若神女見鄭交甫或臨廣庭或當高會又若
韓娥將歌歛態微動輕風娑娑暖紅又若飛燕舞
于掌中半霑斜吹或動或止又若文姬將賦而思
丰茸薜蘿互立遽倚又若麗華侍宴初醉狂風猛
雨一陣紅去又若褒姒初試戎虜滿地春色堦前
砌側又若戚姬死于鞠域花品之中此花最異其
花可以暢君之心目其實可以充
君之口腹匪乎茲花他則碌碌

先人云木以勸之豆以培之火以變之色黃則氣淳矣

叅曰桃為肺果五木之金也金氣清肅故伏邪氣去三蟲除不祥實乾木上曰梟主殺百鬼精物以懸實木上故曰梟也莖葉毛蠹皆可去邪生陽所以異于死陰也其華令好色榮于花優于色故也埤雅云桃生三歲便放花實故周南曰夭桃蕢實也仁主下瘀血血閉癥瘕邪氣者桃肺果精專尤在仁故司肺氣

為營血之師帥則留者行行者留矣故千金方以桃
仁燒灰酒調服方寸匕止崩中漏下然則血之不行
不濡即氣之不決不運氣如橐籥血如波瀾故也桃
毛功力似勝肺主皮毛入肺更相親爾

世但知主留者行不知主行者留非留行安能好
色有子非行留安能去瘀逐閉然則色之不好子
之無有亦即瘀
閉之為咎乎

本經中品

杏核仁氣味甘苦溫有小毒主欬逆上氣雷鳴喉痺下

氣產乳金瘡寒心奔豚

覈曰諸杏葉皆圓而端有尖二三月開淡紅色花妖
嬈艷麗比桃花伯仲間亦可愛也故騷人詠物與梅
並言則曰梅杏蓋取其葉之似也與桃並言則曰桃
杏蓋取其花之近也有葉多者黃花者千瓣者單瓣
者結實實甘而沙曰沙杏黃而酢曰梅杏青而黃曰
柰杏金杏大如梨黃如橘西京雜記載蓬萊杏花五
色北方有肉杏赤大而扁曰金剛拳有曰杏熟時色

青白入藥宜山杏收取仁用修治以沸湯浸去皮尖
每斤用白火石一斤黑豆三合以東流水同煮從巳
至午漉出劈開如金色曬乾乃用得火良惡黃芩黃
耆葛根畏藁草

叅曰枝葉華實皆赤肉理絡脉如營氣味苦溫誠心
之果具心之體與用者仁則包蘊全體逗發端倪樞
機頗銳偏心之用與氣者欬逆上氣雷鳴喉痺寒心
奔豚此一唯從升不能從出正迴則不轉矣杏仁逗

發橫偏之機使豎窮者隨玉衡以為旋轉正神轉不
迴乃得其機矣欬逆上氣息若雷鳴以及喉痺謂心
之火用不及亦可謂客淫外束亦可謂客淫外束致
心之火用不及亦可謂心之火用不及致客淫外束
亦可寒心奔豚謂心之火體不及亦可謂心之火用
不及亦可謂心之火用不及致心之火體不及亦可
謂心之火體不及致心之火用不及亦可蓋火爰物
以顯用即用以顯體故也奔豚者腎之積上逆奔心

緣火位之下水氣承之火不及則承乃亢亢則害矣
與妄汗致承者不同類妄汗則出有餘此則升太過
下氣者轉豎窮為橫徧下非降也降則涉金非火令
矣產乳固屬甲拆而解孚全仗橫徧橫徧始甲拆耳
金刃成瘡此肉理斷絕絡脉不營否以脉勝仍續其
絕絡其營心主脉心主包絡故爾

欲盡物性先察物情如桃為肺果肺主毛桃有毛
專精于毛矣杏為心果心主脉杏有脉專精于脉
矣顧精之所專即情之所鍾情之所鍾即性之所
生人苦不知性耳能盡一物之性即能達萬物之

情欲盡一物之性者亦若物
性之精有所專靡不見性矣

本經中品

髮髮氣味苦溫無毒主五癰關格不通利小便水道療
小兒驚大人瘕仍自還神化

穀曰髮髮剪髻下髮也櫛梳而下者乃亂髮耳修治
取男子年近二十歲已上無疾患及顏貌紅白者從
頂心剪下苦參水浸一宿入瓶子內用火煨赤俟冷
研用一法用水煮七日夜取汁熬膏者彌佳

先人云髮如血脉不潰不泄原從精生又復色黑具上生之體多潤下之力故可收起亟之陰妄奔定淫畏之神飛越也

叅曰腎藏精其榮在髮心主血髮乃血之餘也叢生陽首而復倒垂則炎上之用即潤下之體所謂陽在外陰之使也陰在內陽之守也故主陽失內守而致陽關陰失外使而致陰格與玄府閉而致州都癰交通不表而致驚與瘕也本自神化之餘榮仍自還餘

榮為神化耳

本經中品

犀角氣味苦酸鹹寒無毒主百毒蠱症邪毒瘴氣殺鉤
吻鳩羽蛇毒除邪不迷惑魘寐久服輕身

麋曰出永昌山谷及益州永昌滇南也今出武陵交
州寧州諸遠山黔蜀者次之海南者為上狀似牛豬
首大腹卑脚三蹄前脚直而無膝依木為息木倒則
仆不易起也舌有刺喜啖竹木棘及毒物飲則濁水

不欲自見其影也皮孔三毛如豕有一角二角三角者一在頂上一在額上一在鼻上鼻上者食角也一名奴角小而不墮頂額者每歲一退自埋山中土人潛易之二角者鼻角長而額角短一角者有鼻無額有額無鼻鼻角者胡帽犀額角者兕犀也兕即犀之牴牾也牴毛色青皮堅可以為鎧又有毛犀二角即旄牛所謂牯犀又有水犀出入水中最為難得皮中有珠甲山犀無之異物志云東海水中有一犀焉樂

聞絲竹彼人動樂則出而聽之然犀之優劣觀角紋之粗細通塞以為差等紋如魚子形者謂之粟紋紋中有眼者謂之粟眼黑中有黃花者謂之正透黃中有黑花者謂之倒透花中復有花者謂之重透又紋有倒插者一半已下通有正插者一半已上通有腰股插者中斷不通並名通犀有通天者自下徹上咸通也又有通天犀角上有一白縷直上至端夜露不濡入藥至神驗漢書駭雞犀置米飼雞皆驚駭不敢

啄置屋上烏鳥不敢集犀中最大者墮羅犀一株重七八斤云是牯犀額角其花多作撒豆斑色夜視有光者曰夜明犀通神開水禽獸見之皆驚乃絕品也又有理文盤結作百物形者亦上品又有花如椒豆斑者次之烏犀純黑無花者為下品兕角理文細膩斑白分明不可入藥牯角紋大犛角紋細也修治勿用奴犀犛犀病水犀犛子犀無潤犀唯取肌皺折裂光潤者剉屑入臼杵細研萬匝乃用李珣云凡犀角

鋸成當以薄紙裹置懷中蒸燥乘熱搗之應手如粉
故歸田錄云翡翠銷金人氣粉犀此亦異也松脂為
之使惡雷丸萑菌忌鹽娠婦勿服能消胎氣

叅曰角生頂額鼻端為腦之餘髓之餘也亦似筋餘
之甲血餘之髮甲固宛然紋亦儼若束髮如也山海
經云南方獸之美者有梁山之犀焉似得火化之正
令者也飲則污濁清之也食則毒棘消之也故曰犀
利開寶紀事云辟暑犀色如玉溽暑時清氣逼人白

孔六帖云辟寒犀色如金嚴寒時暖氣襲人嶺表錄
異云辟塵犀佩之塵不近身杜陽編云蠲忿犀蠲去
忿怒夜明犀通天分水鳥見之高飛魚見之深入百
獸見之決驟種種神異凡此皆根塵之妄見為有者
悉能辟除之是能一切空諸所有故能治一切實諸
所無也邪鬼迷惑魔寐此吾意青之實諸所無也瘴
氣鈎吻鳩羽蛇虺百毒此物雜毒之實諸所無也治
之如何曰空

火實欲空者宜空之火空則發也是謂虛其實火
空欲實者宜忌之火實乃能作炎上用以顯煖熱
體所以存其性也自藥有賦人安苟簡曰解乎心
熱並不審病情之欲實欲空而槩投之雖無實實
之虞寧免
虛虛之患

犀角居上而尖峻確具火象然附于坤牛純土之
體是子反生母子氣歸藏而不露故苦寒而翻成
北方之水故能解心熱也本屬火而化水并已
之所有者能空之故凡實所無者遇之自消耳

本經中品

羚羊角氣味鹹寒無毒主明目益氣起陰去惡血注下
辟蠱毒惡鬼不祥嘗不魘寐

覈曰出石城及華陰山谷今出建平宜都諸蠻山中
及西域形似羊毛青而獮夜宿獨棲掛角木上以遠
害也兩角者多一角者最勝其角有節蹙蹙圓繞以
角灣深銳緊小有掛痕者為真修治勿用山羊角山
羊角僅一邊有節節亦疎羚羊角具二十四節內有
天生木胎者此角有神凡使不可單用須要不拆元
對以繩縛之用鐵銼剉細重重密密避風旋旋取用
搗篩極細更研萬匝入藥免刮人腸

叅曰羚羊掛角而泯形獸之至靈者也性慈而不樂
鬪雖有偽鬪亦往解之因以被獲蓋不惜身以濟物
者故其角至神能辟不祥主不魘寐者寂而惺也節
合二十有四氣而胎木者宛如從甲而乙起陰之氣
以轉生陽所以益氣也如是則惡血自除注下自上
上達肝竅目青自明辟蠱毒惡鬼者即轉生陽以辟
不祥耳

本經中品

蚱蟬氣味鹹甘寒無毒主小兒驚癇夜啼癰病寒熱

麤曰夏月始生自蟻螬腹蛸轉相變化乘昏夜出土
中拆裂殼背而出亦有蛸蛸轉丸化生者形大而黑
方首廣額兩翼六足其鳴以脇吸風飲露溺而不糞
三十日而死也古人多食之夜以火取謂之耀蟬古
人用身今人用蛸大抵藏府經絡宜用身皮膚瘡瘍
宜用蛸物各從其類也

繆仲淳先生云蚱蟬稟水土之精風露之氣化而成

形其鳴清響能發音聲其體輕浮能出瘡癰其味甘
寒能除風熱其性善蛻能脫翳障及女子生子不下
也

叅曰蚱蟬即夏至始鳴之蜩也論衡曰蟻螬背行化
為蝮蛸蝮蛸者育于蝮蝮蛸皆折轉為玄蟬化以離
應舍卑穢而趨高潔者也淮南子云無口而鳴其鳴
以脇飲而不食以息飲也三十日乃化蓋自背而腹
自行而折此從督及任循任會督之象也三十日乃

化者如衛氣日下一節二十一日而終督上行九日而終任則周月之化如周月之蒸蒸則變變則化矣無口不食者此亦轉督與任之道歟故主小兒不能從蒸及變內逆而為驚癇癲疾寒熱與不鳴於晝反啼於夜者皆厥藏番陰之證也亦有轉九背拆化為玄蟬運轉任督以及蒸變義更明顯蛻主生子不下亦取解甲變化之易耳

以一微物具此至理若以大小貴賤起見者是局于知聞之褊淺觀釋氏詮蛄蜣為六即佛以其性

與三世諸佛同體無有分釐增減則形中之類任督與衛行督二十一度任九度彌月環周積數餘而蒸變作克肖乎人便不怪異即此可推蒸變已周女二十七男二八精氣溢瀉月事以時下之所繇然矣故古人命名立言雖極微一物亦有至理存焉如蟻蝱之背行先循乎督蝮蝱之育腹專依乎任蝮蝱背拆化為玄蟬復循任會督其如環無端之象轉展化育始全蒸變之全局耳

本經中品

水萍氣味辛寒無毒主暴熱身痒下水氣勝酒長鬚髮止消渴久服輕身

數日生池澤止水中季春始生楊花所化也一葉經

宿即生九葉葉下微鬚即其根也面青背紫者入藥
最良面背皆綠者不堪入藥也七月收采置竹篩內
下以水映之日晒方乾

叅曰穀雨萍始生楊花入水乃化也樹根水上一夕
九子嘗與水平故曰萍也周官萍氏掌國水禁以不
沉溺取名使之稽酒謹酒也然亦水萍之性能勝酒
爾蓋楊先百木青秉春升之敷和萍性善生衍秉夏
出之蕃茂但以升出為用不以風火為氣者以基于

水遂稟水寒之化且味專辛發藉金水之相滋誠逐風清熱解表汗出通調水道之良品也若長鬚髮即水液之外榮止消渴即水氣之內周久服輕身形相類也先人評藥云輕飄浮浪風流酒人易生速計者也然得寒水之化行何患其不相繼乎

本經中品

牡丹氣味辛寒無毒主寒熱中風痙癰驚癇邪氣除癥瘕瘀血留舍腸胃安五藏美顏色療癰瘡

覈曰出漢中劍南及丹州延州青州越州滁州和州
近以洛陽者為勝二月梗上生條葉似芍藥三月開
花色狀善變其名或以姓或以州或以色或以地或
旌其所異者而志之姚黃牛黃左華魏華以姓著青
州丹州延州紅以州著細葉粗葉壽安潛溪緋以地
著一撒紅鶴翎紅硃砂紅玉板白多葉紫甘草黃以
色著獻來紅添色紅九藥真珠鹿胎花倒暈檀心蓮
花萼一百五葉底紫皆志其異者姚黃者千葉黃花

出于民姚氏家姚氏居白司馬坡其地屬河陽然花
不傳河陽傳洛陽洛陽亦不甚多一歲不過數朶牛
黃亦千葉出于民牛氏家比姚黃差小宋真宗祀汾
陰還過洛陽留宴淑景亭牛氏獻此花名遂著甘草
黃單葉色如甘草洛人善別花見其樹知為某花云
獨姚黃易識其葉嚼之不腥魏家花者千葉肉紅華
出于魏相仁溥家始樵者于壽安山中見之斲以賣
魏氏魏氏池館甚大傳者云此華初出時人有欲閱

之者人稅十數錢乃得登舟渡他至花所魏氏日收
十數緡其後破亡鬻其園宅今普明寺後林池乃其
地僧耕之以植桑棗花傳民家甚多人有數其葉者
云至七百葉錢思公有云人謂牡丹花王今姚黃真
可為王而魏花乃后也韉紅者單葉深紅花出青州
亦曰青州紅故張僕射齊賢有第西京賢相坊自青
州以駝馱其種遂傳洛中其色類腰帶韉故謂之
韉紅獻來紅者花大多葉淺紅花張僕射罷相居洛

陽人有獻此花者因曰獻來紅添色紅者多葉花始
開而白經日漸紅至其落乃類深紅此造化之尤巧
者鶴翎紅者多葉花其末白而本肉紅如鴻鵠羽色
細葉粗葉壽安者皆千葉肉紅花出壽安縣錦屏山
中細葉者尤佳倒暈檀心者葉紅凡花近萼色深至
其末漸淺此花自外深色近萼反淺白而深檀點其
心此尤可愛一撒紅者多葉淺紅花葉杪深紅一點
如人以手指撒之九藥真珠紅者千葉紅花葉上有

一白點如珠密其葉蹙其藥為九叢一百五者多葉
白花洛陽花以穀雨為開候而此花長至一百五日
開最先也丹州延州花皆千葉紅花不知其至洛之
因蓮花萼紅花青鉢三重如蓮花萼左花者千葉紫
花出齊民左氏家葉密而齊如截亦謂之平頭紫硃
砂紅者多葉紅花不知其所出有民聞氏子者善接
花以為生買地于崇真寺前治花圃有此花洛陽豪
家尚未有故其名未甚著花葉甚鮮向日視之如猩

血葉底紫千葉紫花色如墨亦謂之墨紫花在叢中
旁心生一大枝引葉覆其上其開也比他花可延十
日之久噫造物者亦惜之耶此花之出比他花最遠
傳云唐中宗有宦官為觀軍容使者花出其家亦謂
之軍容紫歲久失其姓氏矣玉板白者單葉長如拍
板之狀色如玉深檀心洛陽人家亦少有潛溪緋者
千葉緋花出于潛溪寺寺在龍門山後本唐相李藩
別墅今寺中亦無此花而人家或有之本是紫花忽

于叢中特出緋者不過一二朵明年移在他枝洛陽人謂之轉枝花故其接頭尤難得鹿胎花者多葉紫花有白點如鹿胎之紋故蘇相禹珪宅今有之多葉紫不知其所出初姚黃未出時牛黃為第一牛黃未出時魏花為第一魏花未出時左花為第一左花之前惟有蘇家紅賀家紅林家紅三類皆單葉花當時為第一自多葉花千瓣出後此花黜矣今人不復種也別有狀元紅胭脂樓醉西施御樓春壽陽紅瑞霞

蟬灑金紅膩玉紅迎日紅七寶冠石家紅鳳頭嬌繡
球紅赤玉盤海雲紅火燄奴百葉仙人嬌容三變白
朱曰品之以紅著者紫則又有御衣紫朝天紫舞青
猊紫繡球葛衣紫淡藕絲紫雲芳紫姑仙之類若雪
夫人月宮花玉芙蓉萬卷書無瑕玉水晶球粉奴香
合德裝又白中之翹楚而佛頭青則先綠後白者矣
又黃之最艷者如黃絨鋪錦大素小素禁苑慶雲界
金樓小黃嬌軟條黃縷金黃歐家碧種種名相難以

盡述總屬希世之珍玄工之幻也牡丹之名初不載
有文字唯以藥錄本草然于花中不為高第大都丹
延以西及褒斜道中尤多與荊棘無異土人皆取以
為薪自唐則天以後洛陽牡丹始盛然未聞以名著
者如沈宋元白之流皆善詠花草當時有一華之盛
者彼必形于篇詠而寂無傳焉惟劉夢得有詠魚朝
恩宅牡丹詩但云一叢千萬朵而已亦不云其美且
異也謝靈運言永嘉竹間水際多牡丹今越花亦不

及洛陽甚遠是洛陽自古未有若今之盛也而洛陽
之俗大抵好花春時城中無貴賤皆插花雖負擔者
亦然花開時士庶競為遊遨往往于古寺廢宅有池
臺處為市井張幄布帶笙歌之聲相聞最盛者月坡
堤張家園棠棣坊長壽寺東街與郭令宅花落乃罷
葢花之美在朝露夕霞清風明月華情恬適色神始
艷或烟雨霧籠燈火掩映更增容冶若日午鬧喧糟
場羶會此花罹困窮轉添憔悴及其盛時每多風妬

亦造化之所忌也從來洛陽至東京六驛舊不進花
自徐州李相廸為留守時始進御歲遣衙校乘驛馬
一日一夜至京師所進不過姚黃魏黃三數朶以菜
葉實竹籠子藉覆之使馬上不動搖用蠟封花蒂乃
數日不落大抵洛人家家有花而少大樹者蓋其花
不接則不佳爾春初時洛人于壽安山中斲小栽子
賣城市間謂之仙篋子人家治地為畦塍種之至秋
乃接接花工尤著者謂之門園子豪家無不邀之姚

黃一接頭直錢五千秋時立契買之至春見花始歸
其直洛人甚惜此花不欲傳有權貴求其接頭者或
以湯中蘸殺與之魏花初出時接頭亦直錢三千今
尚直一千接時須用社後重陽前過此不堪矣花之
木去地五七寸許截之乃接以泥封裹用軟土攪之
以箬葉作菴子罩之不令見日雨惟南向留一小戶
以達氣至春乃去其覆此接花之法也花種必擇善
地盡去舊土以細泥用白欵末和之蓋牡丹根甜多

引蟲食白歛能殺蟲此種花之法也澆花亦自有時
或用日未出時或日出時九月旬日一澆十月十一
月三日二日一澆正月間日一澆二月一日一澆此
澆花之法也一本發數朶者擇其小者去之只留一
二朶謂之打剝懼分其脉也花纔落便剪其枝勿令
結子懼其易老也春初既去箬菴便以棘數枝置花
叢上棘氣暖可以辟霜電不損花芽他大樹亦然此
養花之法也花開漸小于舊者蓋有蠱蟲損之必尋

其穴以硫黃簪之其旁又有小穴如鐵孔乃蟲所藏處花工謂之氣窻以大針點硫黃末針之蟲乃死蟲死花復盛此醫花之法也烏賊魚骨以針花樹入其膚花輒死此花之忌也入藥以山產紅花單葉之根皮為貴蓋專精于花者則力不足于根之皮矣修治用銅刀劈破去骨剉如大豆好酒拌蒸從巳至未日乾用畏貝母大黃兔絲子忌蒜胡荽伏砒

參曰牡門戶樞丹英華色也取象與色當入足少陽

厥陰以少陽經主樞府主決斷厥陰肝主色主筋主
藏魂主藏血主謀慮故也牡丹精勝者色辛發者味
宣氣散生者性合鼓吾身風大以全木德者也故主
中風寒熱瘕瘕驚癇癰腫瘡瘍謂外來風氣使然亦
可謂吾身風大不及亦可瘕堅瘕血留舍腸胃固肝
主藏血堅瘕留礙則非所應藏物矣所當決而斷之
安五藏美顏色十一藏皆取決于膽安而后能慮樞
機其神乎

本經中品

泉耳實氣味甘溫有小毒主風頭寒痛風濕周痺四肢拘攣痛惡肉死肌膝痛久服益氣耳目聰明強志輕身
穀曰所在有之與麥互相為候麥黃種泉泉黃種麥也莖高四五尺有黑色斑點葉如葵四畔寬紐七八月開細白花結實如婦女珥璫外殼堅靱刺毛密布中列兩仁宛如人腎修治炒熟去外刺取仁酒拌蒸晒乾用

叅曰泉耳麻類也爾雅名卷耳取實如鼠耳其色蒼
蒼復名蒼耳雒下謂之胡荽江東呼為常泉以葉青
白似胡荽白花細莖可作茹僮人皆食之滑而少味
故幽冀謂之禮茹菜又謂之常思菜也離騷單名曰
施以譬小人所謂資紫施以盈室是矣博物名羊負
來謂雒人入蜀有泉耳着羊毛蜀人種之曰羊負來
故泉多叢刺亦好着人衣也圖經名道人頭綱目名
猪耳又名喝起草記事珠名地葵又名進賢菜名號

雖多總屬象形取義今遵本經泉耳為正蓋耳者聽之官腎之竅肺之司故泉形似耳實中兩仁似腎殼皮堅韌叢毛剛勁從革作金之肺象也固入肺腎以腎為主腎藏志志者腎之神也志强竅斯開竅開耳斯聰耳聰聲斯入若以肺為主設腎不司竅雖有其聲不與耳接非耳外聲聲無所爾益氣者竅開氣斯益設有氣無竅亦填塞不輸何繇宣布亦可入肝色蒼故也入肝則肝得其用肝以金為用耳肝固開竅

于目而目之能視腎所司也即轉揆瞳人需以利金
又可入脾味甘故也設土實不靈遂致肌死以及肢
攣敦土德用自然反活回鮮又可入心氣溫故也心
用為水水司液心司血血液充滿乃得筋轉脉搖故
不獨五藏咸入即筋骨肌肉頭目腦髓靡不周到但
致疾之因風濕使然風淫偏勝剛以濟之如痺于頭
則風頭寒痛痺于百骸則周痺痺于四肢則四肢拘
攣痛痺于肌肉則肌肉死惡痺于膝則膝痛痺于氣

則氣損痺于耳則耳聾痺于目則目盲痺于志則志
頽痺于身則身重身木罔覺有觸種種變證皆藉以
濡潤宣達交互承制者也世但知治療瘡瘍殊失靈
異備錄名相用廣見聞

本經中品

當歸氣味苦溫無毒主欬逆上氣溫瘧寒熱洗洗在皮
膚中婦人漏下絕子諸惡瘡瘍金瘡

數曰生隴西川谷今當州宕州翼州松州泰州汶州

多種時矣仲春生苗布葉似牡丹葉嫩綠三瓣七八
月開花似時蘿花嬌紅可目根黑黃色肉厚不枯者
為勝秦州者頭圓尾多色紫氣香肥潤多脂名馬尾
歸此種最佳他處者頭大尾粗色白枯燥名饒頭歸
不堪用也大都川產者力剛而善攻秦產者力柔而
善補雷公云去蘆頭酒浸一宿止血破血頭尾効各
不同破宜使頭止宜用尾並服無効單使為貴也元
素云頭止血尾破血身和血全用則一破一止矣李

杲云頭止血而上行身養血而中守尾破血而下流
全活血而不走時珍云雷張兩說功效各異大凡根
莖身半已上氣脉上行法乎天身半已下氣脉下行
法乎地而人身法象天地則治上當用頭治中當用
身治下當用尾通治當全用此一定之理當以張說
為優以頤論之雷說為當經云藏真高于肺以行營
衛陰陽也藏真下于腎腎藏骨髓之氣也唯居上者
乃能行居下者乃能止所謂欲舉必先按欲按必先

舉耳而行中有止止中有行此又上下相參之妙收
藏須晒乾乘熱裹紙封固甕中則不蛀

叅曰古人相招以文無文無當歸也蓋以功用為名
矣味苦氣溫臭香色紫當入心為心之使藥心之血
分氣分藥也祇判入血便失當歸本來面目矣何也
血無氣响則不能運行經隊灌溉周身彼此依循互
為關鍵經云藏真通于心心藏血脉之氣也如欬逆
上氣此即氣不于歸皮膚之中營氣之所舍也溫瘧

寒熱不在皮膚外肌肉內而洗洗在皮膚中此邪不
于歸營無歸向若漏下即血不歸還絕子即血無歸
息金瘡即血不歸旋瘡瘍即氣不歸攝當歸助氣之
用益氣之體能使氣血邪氣各歸于所當歸之地煮
汁飲之宣揚帥氣耳唐詩云胡麻好種無人種正是
歸時又不歸良有以也

本經中品

芍藥氣味苦平無毒主邪氣腹痛除血痺破堅積寒熱

疝瘕利小便益氣

覈曰出中嶽川谷及丘陵今出白山蔣山茅山者最好處處亦有人家種蒔矣昔稱洛陽牡丹廣陵芍藥甲天下今藥中亦取廣陵者為勝十月生芽至春乃長赤莖叢生三枝五葉花葉子實都似牡丹第逗芽在牡丹之前作花在牡丹之後傳云驚蟄之節後二十五日芍藥榮是也花有單葉千葉千葉者俗呼小牡丹今羣芳中牡丹昌第一芍藥第二故世謂牡丹

為華王芍藥為華相又或以為華王之副也花之名
曰餘容綽約慶雲紅蓮香白醉芙蓉步步嬌玫瑰紫
綠衣郎同心結西施睡起楊妃吐舌槩言之曰花婢
種種幻巧難以縷述根之名曰鋌曰犂食曰白木曰
餘容入藥只宜白花單瓣之根氣味全厚然根之赤
白亦隨花之赤白也白者曰金芍藥赤者曰木芍藥
概根莖花葉統名曰離草一名曰將離修治先別赤
白白根固白赤根亦白每根切取一片各以法記火

酒潤之覆蓋過宿白根轉白赤根轉赤矣各以竹刀刮去皮併頭剉細蜜水拌蒸從巳至未晒乾用今市肆一種赤芍藥不知為何物草根瘍癭兒醫多用之此習焉而不察其為害殊甚也雷丸為之使惡石斛芒消畏消石鼈甲小薊反藜蘆

叅曰爾雅翼云芍藥花之盛者當春暮拔除之時故鄭之士女取以相贈董仲舒以為將離贈以芍藥者芍藥一名可離猶相招贈以文無文無一名當歸也

然則相謔之後俞使去爾其根可以和五藏制食毒
故古之遺法馬肝食之至毒者文成以是死言食之
毒莫甚于馬肝則制食之毒宜莫良于芍藥故獨得
藥之名猶食醬掌和庶羞之類而醬又因以為名也
子虛賦云芍藥之和共而後御之南都賦云歸鴈鳴
鵝香稻鮮魚以為芍藥氣恬臭酸百種千名是因致
其滋味也故隱居一名犁食蓋拔除不祥制服食毒
和御衆情則離中有合合中有離一勺之多萬鈞之

力矣顧其時值閉藏便行甲拆一派生陽絕不以黨
錮為禁忌則凡藥之所難及力之所難到者靡不駢
馳翼驅叶直以往故引導最先逗機極早雖牡菌二
桂先聘通使亦必藉之以為前驅世稱氣味酸欬唯
堪降入此不識臭味不顧名義者矣觀主邪氣入腹
遂閉拒成痛芍從中開發逐邪從內以出至滌除血
痺入破寒熱疝瘕已成堅積唯堪消隕者芍力轉倍
若小便不利為癰為約裨益肝氣偏行疎泄雖屬在

下先開在上欲按則舉欲舉則按此必然之勢苟亦兩得之矣徧閱別錄方書比量推度盡人之性則能盡物之性不致為耳食所縛藥物之幸大矣

本經中品

欬冬花氣味辛溫無毒主欬逆上氣善喘喉痺諸驚癇寒熱邪氣

覈曰出關中及雍州南山溪水華州山谷水澗間多叢生葉似葵葉而大不顧冰雪先春而花去土一二

寸出萼如菊色青紫通直而肥開時花黃色花在根
下也一種花紅者葉如荷而斗直大可容升俗呼蜂
斗修治須取微見花者如已芬芳則無氣力揀去向
裏裹花蒴殼併向裏實如栗零殼及枝葉以甘草水
浸一宿却取欸冬葉相拌蒸一夜晒乾去葉用杏仁
為之使得紫蒴良惡皂莢消石玄參畏貝母辛夷麻
黃黃耆黃芩連翹青箱

參曰以堅冰為膏壤吸霜雪以自濡此水裏陽生宜

當入腎腎之心藥也故出肺腎之邪先肝心之用與
緼藉幽深者不相侔也驚癇邪氣伏匿于中對待治
之發越盡淨若欬逆上氣善喘喉痺因腎苦燥及形
寒飲冷秋傷于濕者始宜或火熱刑金或肺氣焦滿
恐益消鑠毀傷矣

本經中品

芎藭氣味辛溫無毒主中風入腦頭痛寒痺筋攣緩急
金瘡婦人血閉無子

數曰芎藭靡蕪根也川中者勝胡戎者曰胡芎關中者曰京芎蜀中者曰川芎天台者曰台芎江右者曰撫芎皆以地得名也清明後宿根生苗即分其枝橫埋土中節節作根生苗也八月後始結芎藭葉似芹微窄有叉又似白芷而細亦似胡荽而壯一種葉似蛇床而稍粗莖葉俱香莖細節太纖柔青整繁蕪靡弱也種蒔者根形塊大實而多脂山生者細瘦辛苦五月采苗十月采根非時則虛惡不堪入藥矣凡用

其根取川中大塊色白不油嚼之辛甘形如雀腦者
佳白芷為之使畏黃連伏雌黃得細辛療金瘡止痛
得牡蠣療頭風吐逆

叅曰芎藭諧聲穹高也極也窮究竟也言主治作用
也故主風中頭腦或腦痛或頭腦俱痛者此風氣通
于肝亦即春氣者病在頭也力能直達肝用從踵徹
巔正鼓而邪自罷矣風與寒合斯成筋痺或攣或緩
或急者此屬不直直之使通也併治金瘡者仍轉動

搖以成執持血閉即血痺逐而通之使巳亥相合以結胞胎寅申交會而成種子皆究竟高遠之義

風氣通于肝物各從其類春氣者病在頭魚涉負水之候乎

巳亥相合厥陰始結胞胎寅申交會少陽乃作乳字

本經中品

陽起石氣味鹹微溫無毒主崩中漏下破子藏中血癥瘕結氣寒熱在腹中無子陽痿不起補不足

覈曰陽起石雲母根也出齊山及雲山泰山瑯琊諸

山谷今唯齊州采取他處不復識之矣僅一土山石
出其中彼人謂之陽起山其山嘗有暖氣雖盛冬大
雪獨無積白蓋石氣熏蒸使然也山惟一穴禁閉不
開每歲初冬州官監采第歲月積久其穴益深鑿鑿
他石得之甚難以白色明臺雲頭雨脚輕鬆若狼牙
者為上黃色者亦重其上猶帶雲母者稱絕品也揀
擇供上剩餘者州人方貨之不爾無繇得也庚辛壬
冊云陽起陽石也齊州揀金山出者為勝其尖似箭

簇者力强如狗牙者力微置雪中倏然沒跡者為真
寫紙上飄然飛舉者乃佳也桑螵蛸為之使惡澤瀉
茵桂雷丸石葵蛇蛻皮畏菟絲子忌羊血不入湯煎
用

叅曰起陽以為量因名陽起石耳蓋陰氣流行則為
陽陽氣凝聚則為陰故主凝聚以為膏流行以為用
也陽起雲母根高山陽起母雲母陽起互相叅勘則
知內守外使之為用矣

陽在外陰之使也陰在內陽之守也陰者藏精而起亟陽者衛外而為固陽起兩得之矣

本經中品

雄黃氣味苦平無毒主寒熱鼠癰惡瘡疽痔死肌殺精物惡鬼邪氣百蟲毒勝五兵煉食之輕身神仙

覈曰出武都山谷燉煌山之陽武都氏羌也是為仇池宕昌亦有但小劣耳近用石門始興石黃之好者純而無雜色如雞冠光明晻晻者最勝階州接西戎界出一種水窟黃生山岩有水處其石曰青煙石曰

白鮮石雄黃出其中有孔竅色深紅微紫體極輕虛而功用更勝水經注云黃水出零陵縣西北連巫山溪生雄黃頗有神異嘗以冬月祭祀鑿石深數丈方采得之但凡雄黃色純黃似雌黃色而無光明或青黑而堅者曰熏黃氣臭者曰臭黃並不堪服修治每雄黃三兩用甘草紫背天葵地膽碧稜花各五兩細判以東流水入坩鍋中煮三伏時取出搗如粉水飛澄去黑者晒乾再研用其內有劫鐵石又號赴矢石

能劫于鐵並不入藥用

叅曰雄大也武也以將羣也雄而黃純而健者也于金云婦覺有妊作絳囊盛佩易女為男此轉陽精旋于地產耳鼠瘻曰寒熱病惡瘡疽痔皆名死肌百骸焦府悉屬地大故也陰凝堅而黃中失安能通理雄力含弘而光大之可稱大黃大黃賦名將軍此足當之矣故功勝五兵殺精物惡鬼邪氣百蟲毒為害也煉食之輕身神仙地仙類耳

本經中品

雌黃氣味辛平有毒主惡瘡頭禿痂疥殺毒蟲虱身痒邪氣諸毒充四肢通谿骨鍊之久服輕身增年不老

麝曰出武都仇池者曰仇池黃色小赤出扶南林邑者曰崑崙黃色如金舶上來如噀血者為上湘南者次之似雲母甲錯層層可拆軟如爛金者尤佳雌雄二品同生山之陽生雄山之陰生雌雄者金精所熏一曰金之苗也雷公云修治勿令婦女與新犯姪人

及不男女非形人或雞犬刑獄臭穢之地犯之色變
如鐵損人壽不堪用矣每雌黃四兩用天碧枝和陽
草粟遂子草各五兩入瓷鍋中煮三伏時其色如花
一朵在鍋底中遂用東流水猛投于中如此淘三度
去水拭乾搗研如塵用雌得芹花立便成庚芹花一
名立起草形如芍藥煮雌能住火也又云造化黃金
非此不成亦能柔五金乾瀕轉硫黃伏粉霜土宿真
君云芎藭地黃獨帚益母草羊不食草地榆五加皮

瓦松冬瓜汁皆可制之雌見鉉及胡粉則色黑

叅曰雌羽母地類也黃中通理暢發以為體用者也
老子云知其雄守其雌為天下谿故達谿骨暢四肢
發肌腠勝五兵與雄等也咸屬金精之所鍾唯雌雄
之有別耳

本經中品

牛角腮氣味甘平無毒主下閉血瘀血疼痛女子帶下
血燔之酒服髓氣味甘平主補中填骨髓久服增年膽

氣味苦寒可丸藥

覈曰古者牛唯服車易云服牛乘馬書云肇牽車牛
其力在肩其用以角抱朴子云牛結陣以却虎環其
角外觸虎雖猛巧不能制也其類有三沈牛犛牛掇
牛也沈牛大犛牛小掇牛尤其卑小者爾雅謂之攬
牛會編謂之紈牛廣南謂之果下牛者是也犛牛色
黃黑赤白駁雜數種沈牛喜沒水中其狀如豕大腹
銳角角若擔矛色青蒼亦有白色者俗謂之水牛鬱

林人謂之洲留牛者是也牝曰牝曰犂牡曰特曰牝
曰牯曰犢曰犢子曰犢曰犢曰犢三歲曰犢四歲曰
牝五歲曰牝六歲曰牝察其齒以知其歲其齒有下
而無上也三歲者二齒四歲者四齒五歲者六齒六
歲以後者歲接骨節一節也牛之形色白曰牝黑曰
牝赤曰牝駁曰犂曰犂純色曰牝純黑曰牝白黑雜
毛曰牝犂黃白曰牝駁如星曰牝黃牛虎文曰牝黃
牛黑唇曰牝黑背曰牝黑耳曰牝黑腹曰牝黑脚曰

捲體長曰狝脊長曰羶白脊曰犮曰將領如橐駝曰
爆髀膝尾皆有長毛曰獵角一俯一仰曰觭角長二
尺有五寸三色不失曰載重千觔出巴中曰庠重數
千觔出岷山曰犂曰犖去勢曰犍曰牯無子曰犒絕
有力曰欣猓項垂曰胡蹠肉曰犖百葉曰牒角胎曰
腮鼻木曰拳嚼草復出曰齧腹草未化曰聖蠶相牛
者壁堂欲閤膺廷欲廣豪筋欲就雋骨欲垂插頸欲
高排骨欲密尾不用至地頭不用多肉角欲得細身

欲得圓眼欲得太口方易飼鼻廣易牽倚欲如絆馬
行欲如麟趾蹠欲如八字形欲如卷懸亂睫好觸龍
頸突目善跳毛拳角冷有疾毛少骨多有力岐胡有
壽嘗鳴有黃目脉且赤而體瘦也牛之為物病則耳
燥安則溫潤而澤故古之視牛者以耳詩云爾牛來
思其耳濕濕濕言潤澤也牛耳無竅以角聽也易
林云牛龍耳聵龍亦聵者矣牛畜之有力而順者但
有豎瞳而無橫瞳見一物輒長造天故童子得而制

之聲曰牟音曰宮管子云凡聽宮如牛鳴竅中牛含
宮聲故柳子以為黃鐘在脰也牛夜鳴則厝厝久屋
朽木也古稱牛膏曰香故其臭朽則不可食矣造化
權輿云乾為馬坤為牛乾陽物也馬故蹠圓坤陰物
也牛故蹠圻陽病則陰勝故馬疾則卧陰病則陽勝
故牛疾則立馬陽物也故起先前足卧先後足牛陰
物也故起先後足卧先前足馬嘗立馬病則卧牛嘗
卧牛病則立牛走風順馬走風逆牛馬風逸往往不

相及也山海經云稷後曰叔均是始耕郭氏云用牛
犁也許叔重以為牛者所植穀穀者民之命是以王
法禁殺牛民犯禁殺之者誅周官牛人掌國之公牛
以待政令祭祀供享牛求牛賓客供粢牛膳牛饗食
供膳羞牛軍士供犒牛喪事供奠牛軍旅供兵軍之
牛祭禮云一元大武祭天地之牛角繭栗宗廟之牛
角握賓客之牛角尺帝牛不吉以為粢牛帝牛必在
滌三月稷牛唯具也又云天子以犧牛諸侯以肥牛

大夫以索牛周禮云牧人掌六牲凡陽祀用牝牲陰祀用黝牲望祀各以其方之色外祭毀事用犝可也周禮疏云牛宜稌稌土穀牛土畜故牛宜稌藏器云牛自死者血脉已絕骨髓已竭不可食病死者令人疥癬洞下白首者獨肝者有大毒噉蛇者殺人仲景云噉蛇牛毛髮白而後順者是也時珍云角腮角內堅骨也角為筋之餘腮為角之粹也故腮在角中一名角胎

叅曰牛者稼穡之資五畜之土脾藏之畜也律書冬至日牽牛言陽氣牽同萬物出之也故本經取用在角腮則又為角木之胚兆耳蓋土爰稼穡稼穡作甘所以俾全土化之體用者也經云脾統血閉瘀則具體失用帶血則顯用無體咸忘所統而體用分之燔之以火轉藉母氣功力始備髓填髓者為象形膽丸藥者為十一藏皆取決于膽也

本經中品

鼈甲氣味鹹平無毒主心腹癥瘕堅積寒熱去痞疾息肉陰蝕痔核惡肉

穀曰鼈介蟲也水居陸生穹脊連脇與龜同類四緣有肉如裙故曰龜甲裹肉鼈甲裹骨無耳以目為聽與蛇龜為匹夏月孕乳其抱以影陸佃云魚滿三千六百則蛟龍引之而飛納鼈守之則免故一名守神亦名河伯從事修治取綠色九肋重七兩者為上用六一泥固瓶子底待乾置甲于中欲治癥塊及寒心

用頭醋三升入瓶內大火煎盡去裙留骨炙乾用欲
治勞熱以童便一斗二升煎盡去裙留骨焙乾石臼
中搗成粉以雞胫皮裹之取東流水三斗以盆盛水
閣于盆上一宿取用力有萬倍也惡礬石理石

叅曰鼈無耳以眼聽故其目不可瞽識精于明復識
精于聰也不唯精專肝竅膽亦異衆而味大辛穹脊
連脇脇亦少陽膽府所屬此木金交互故得聲色疊
用而肝為膽藏取決更相親耳以余叅之若以膽開

聾瞽必色斯明聲斯聰彼施諸房術者風斯下矣味
鹹走血軟堅為厥陰肝少陽膽血分之氣藥也蓋肝
藏血設所藏非精所守非神致陰凝至堅為癥瘕痞
積息肉惡肉陰蝕痔核者軟之決之亦藉膽斷使去
者也

本經中品

白殭蠶氣味鹹辛平無毒主小兒驚癇夜啼去三蟲滅
黑黯令人面好男子陰癢病

穀曰白殭蠶蠶病風死其色自白死且不朽也今市肆多用中溫死蠶以石灰淹拌令白服之為害最深若痘疹必燥裂黑陷若瘡毒必黑爛內攻不可不慎也修治用糯米泔浸一日俟桑涎吐出浮水上者即掠去之洗淨漉起微火焙乾淨布拭去黃肉毛并黑口甲搗篩如粉

叅曰蠶昆蟲也見明則食食而不飲三十日乃化有引日多與少者此寒溫飢飽之為修短耳三眠三起

起如衛氣之出行陽道眠如衛氣之入行陰道三十日大眠則衛道已周周則變而化吐絲為經矣不化者風白為殭故象形從治內逆而為驚癇夜啼伏匿而為三蟲鬼疰外顯黑黯而不明囊殼欲蛻而作癢者此皆不能從蒸及變順之使出以從化也淮南子云蟬飲不食蠶食不飲飲滋經氣食益經隧咸從任督四布經絡變化相同功能亦一也



本草乘雅半偈卷四